

# 2 BEKORINTIO

## É Kálara Beañ Bekorintio

### Mebéránn

**1** <sup>1</sup>Pablo, ápostol Kristo Yesus ákála nkómánn Nzamá, bía mwadzan Timoteo, ékóánn bebwíni Nzamá é ne á Korinto, ya mítópbán mí bot míse mí ne Ákaya áse. <sup>2</sup>Abwará ya mvwaá bí tɔbɔgé ya mína ébe Nzamá é Tará wea, ya Ntí Yesukristo.

### Ávé akíba

<sup>3</sup>Olugú ó bɔ́ge ya Nzamá, Éséá Ntí wea Yesukristo, Éséá ye á nyénánn engóngɔ́ɔ́ ya Nzamá ye á mfoɔ́ann mílém ósesé. <sup>4</sup>Éñí aa foɔ́ bía mílém ébe mídzúúk myea míse, ná bía bí ne fe foɔ́ mílém ébá bé ne amvála mídzúúk míse été, ya ámvála mfoɔ́ann mílém bía bébyen bía bí ne fe ya wó ákála Nzamá.

<sup>5</sup>Éde, amvála ané mídzúúk Kristo myá fwíige ébe bía, amvála te fe ya amú Kristo mfoɔ́ann mílém wea wá wá fwíige fe. <sup>6</sup>Ve, ngé bía yén midzuúk, é ne á mfá mfoɔ́ann mílém wenan ya fe ákoroga denan; ngé bía bí belé ki mfoɔ́ann mílém, é ne á mfá mfoɔ́ann mílém wá vwála mína ná mína míní nzomo fe mídzúúk míwɔ́ɔ́ ya míwɔ́ɔ́ bía bía yén fe. <sup>7</sup>Éde, óyan wea á mfá wenan ó ne kaa áfógan, bí yem ná ámvála mína ñɔɔ́ ngap ébe midzuúk, amvála te fe mína ñɔɔ́ dɔ ébe mfoɔ́ann mílém.

<sup>8</sup>Amú ná, á bɔ́bédzan, bíá kómo ná míní bɔ́ kaa áyem, ébe ndzuúk bí ngá yén Ásia, akála ná bía bíra dzuk abwiññ álot ábímm bí mbé kɔk, akekwiñ ná bí ngá dzímle atwaa mebúnn méye ákólo ó véa ya éniɔ́. <sup>9</sup>Ya dzam te, bía bébyen bía bí ngá tém fe ná bí mbelé nsan áwú, á mfá ye ná bí bɔ́ kaa átɔbɔ́ ya bía bébyen mebúnn, fáve ébe é Nzamá aa wómo bewú. <sup>10</sup>Éñí a ngá koro bía á bora ángónó áwú été, éñe fe aa ye bía koro, bí tɔ́ fe ya ñí mebúnn ná aa ye fe tsíni ná aa koro bía. <sup>11</sup>Éde míní bɔ́ fe eséññ bíabe mína fufúlu á méyaglán été, ná néa éñe abwiññ bot dá ye vé akíba ákála é mvɔ́mm bé vé yaá bía ébe mína.

### Ákéá Pablo eé ndzí ke ya dɔ á Korinto

<sup>12</sup>Amú ná, mevágá mea émo má ná, é ngañiá ye nlém wea, éñí ye á nlém mbóó ya kaa ayeŋŋ ébí Nzamá, se ákála kén mot, fáve ébe é mvɔmm Nzamá; bía bí tɔbo yaá fe é sí ñí, ádaŋdaŋ énzénzaŋ denan été. <sup>13</sup>Amú ná bíá tsili mína dzaŋ enziŋ afé, fáve édí mína lánŋ ngé ki áyem, éde me tɔó fe ya mebúnn ná mína ye yem akekwiñ asúgánn, <sup>14</sup>amvála ané míní yem yaá fe bía ngúrá mfá, ná bía bí ne akéá ye mévágá menan, amvála avóó ya avóó mína míní ne fe dɔ á mfá wea ébe é mos Ntí wea Yesus.

<sup>15</sup>Éde ya mebúnn méte, maá kík ná é ne ma tára nzu ébe mína, á mfá ye ná mína míní ñɔŋ mvɔmm éyɔŋ beañ; <sup>16</sup>ná meé ke á Masedonia, ma ye lot ébe mína; véa meé sɔ fe á Masedonia, meé bera lot ébe mína; á mfá ye ná mína míní vwála ma ná me ke á Judea. <sup>17</sup>Édo é ne ná, meé kyaa dzaŋ te; ye ná maá bo dɔ mbíí ya mbíí? Ngé ki ná édí ma kyaa, ye ná ma kyaa dɔ amvála ané mot, ná ébe mámyen été, mé belé etéññ evóó: “Áá, Áá” ya “Móamó, Móamó”? <sup>18</sup>Ve, Nzamá a ne éñí bá tɔbo ya ñí mebúnn, ná éfiá dea é sés ébe mína Áá ya Móamó. <sup>19</sup>Amú ná Kristo Yesus, é Mwán Nzamá, éñí bí kat yaá fwéñ énzénzaŋ denan, bía Silvano ya Timoteo, deé ndzí bo Áá ya Móamó, fáve ná é bo yaá: Áá ébe éñe. <sup>20</sup>Amú ná mengaá mése Nzamá, ébe éñe mése mé ne Áá; ya dzaŋ te édo fe ébe éñe mé ne Amén, á mfá é dúmá Nzamá ébe ákála dea.

<sup>21</sup>Ve, éñí aa yém bíabe mína ébe Kristo, éñe fe a ngá téle bía eki, éñe a ne Nzamá. <sup>22</sup>Éñe aá bem bía sitám; a vé yaá fe bía Nsísim mílém myea ané ébánn é ne é ngap ósúá.

<sup>23</sup>Éde, ma lwée Nzamá ané é ngañiá wɔm, ná maá búk ékena dam á Korinto á mfá ye ná me dzɔgo mína. <sup>24</sup>É sés ná bía dzwée mbwínánn wenan, fáve ná bí ne bevwála fufúlu bíabe mína á mfá mésán menan, amú ná ébe mbwínánn míní ngén míní téle.

**2** <sup>1</sup>Amú ná maá kík é dzaŋ dí ébe mámyen ná, maá bera nzu ya mína ya eywiññ. <sup>2</sup>Da é tɔó ná, ngé ma vé mína eywiññ, véa nzá ñí aa ye ma vé mesán, nde se fáve éñí me tɔó yaá eywiññ? <sup>3</sup>Dzaŋ te édo fe me ngá tsili mína ná, éyɔŋ ma ye sian me nza belé eywiññ ébe é bot bá yian ma vé mesán; meé tɔbo fe ya mína bése mébúnn, ná mésán mam má mé boóge éma mína bése. <sup>4</sup>Amú ébe abwiññ ndzuúk ya nlém mitéñ maá tsili mína ya abwiññ míge, se ná míní tɔbo ya eywiññ, fáve ná ngé míní ne yem nzá ámvála edziŋŋ me belé ádaŋdaŋ ébe mína.

### Pablo aa yágale á mfá bidzwiigá

<sup>5</sup>Éde, ngé mot enziŋ a tɔó yaá ma eywiññ, se ma etámm a tɔó eywiññ, ná me nza daŋ bo ngét, fáve ná aá bo dɔ mína bése. <sup>6</sup>Éde, ákira abwiññ bot é vé yaá mot te, é yian yaá; <sup>7</sup>édo é ne ná, mfá mbóó, dá daŋ ya mvéáñ ná míní dzwii ñí ya áfoŋ ñí, é nza bo amvála enziŋ ná éywiññ dá é bíra ñí

mana dzugu. <sup>8</sup>Akála dzam te édo ma lép mína ná míní lére édziŋ denan ébe éñe; <sup>9</sup>akála dzam te fe maá tsili mína, á mfá ákyak mína ná me yem ngé mína bo dzam ése mewók. <sup>10</sup>Édo ná éñí mína dzwii dzam enziŋ, ma ma dzwii fe ñí; édí me dzwii yaá, ngé me dzwii yaá dzam enziŋ, maá bo do ébe Kristo akála denan, <sup>11</sup>ná Sátan a nza duan ya afóo ébe bía; akála bíá dzími ki bínginiŋe byeñ.

<sup>12</sup>Éde éyɔŋ mé ngá sian á Troas akála é mbamba fwéñ Kristo, mbéñ wa ó yɔŋbe fe ma ébe Ntí, <sup>13</sup>meé ndzí belé awaabé á nsísim wɔm été akála ná meé ndzí koan ya mwadzan Tito; fáve ná maá yáán ya bó, mé kéñ á Masedonia.

### Pablo aa vé Nzamá akíba

<sup>14</sup>Ve, akíba ya Nzamá, éñí a ntéle bía ósú ná bí wún tám áse ébe Kristo, éde ná ébe bía, énum ye á nyemann weñ dá léreban vóm áse; <sup>15</sup>akála ná, bía bí ne énum dá só ébe Kristo á mfá Nzamá, ané ébá bá koroban ané ébá bá dzáj; <sup>16</sup>ébe ngúra mfá bot, enum ye áwú á mfá áwú; á mfá ébá bevɔɔ, enum ye éniŋ á mfá éniŋ.

Éde á mfá mam méte, nzá a ne éñí émyen aa kut twíñ? <sup>17</sup>Amú ná bí sés amvála ané abwiññ bot dá bo éfíá Nzamá okira, fáve ná bía kóbo ébe Kristo ya nlém ósesé, ané á mfá Nzamá ya ósú Nzamá.

### Mína míní ne é kálara Kristo

**3** <sup>1</sup>Ye ná bía bera mína tára lére bía bébyen ná bí ne nkyabán? Ngé ki ná, ye ná bía yi, amvála ané bot benziŋ, bekálara bé nkyabán ébe mína, ngé ki á mfá wenan. <sup>2</sup>Mína míní ne é kálara wea, ntsilann mílém myea été, bot bése béé láŋ ñí, béé yem fe ñí, <sup>3</sup>é kwíñ yaá éyéá été ná míní ne é kálara Kristo, bía bía tsili ñí, a sés ntsilann ya nsɔŋ, fáve ya Nsísim é Nzamá a ne ntetéá; a sés ntsilann méfép mekwá, fáve méfép méye á nlém mot binam.

<sup>4</sup>Ve, bí belé mebúnn méte ébe Kristo ósú Nzamá; <sup>5</sup>dé sés ná bía bébyen bía ñɔŋ ná bía tá do twíñ, fáve ná nkɔkgán wea wá só bía ébe Nzamá, <sup>6</sup>Éñe fe aá téle bía ané mikɔkgán bevwála bíséññ béye á mfeñeñ elat, se édí ye á ntsili, fáve édí ye á Nsísim; amú ná ntsili wá ywíñ, ve Nsísim ñí aa vé eniŋ.

### Eséññ ye áwú ya eséññ ye á Nsísim

<sup>7</sup>Ve ngé mbɔann eséññ Nzamá ye áwú, ó tɔɔ ntsilann á mefép mékwá ó mbé ya dúmá, akekwiñ ná bwann Israel bée mbé bem Moisés mís ásu, akála é dúmá é mbé ásu deñ, édí é ngá ke dá síbi; <sup>8</sup>Nde mbɔann eséññ Nzamá ye Nsísim wáá ye danɗan ya dúmá. <sup>9</sup>Amú ná ngé mbɔann eséññ Nzamá wá ñɔŋ nkíkán misan ó mbé ya dúmá, mbɔann eséññ Nzamá ye á nzósoó éwɔ wá ye dan fwíge ya dúmá. <sup>10</sup>Édo ná, édí é mbé ya dúmá, é

súgan yaá kaa dúmá, akála é dúmá dá dan ya nnén. <sup>11</sup>Amú ná ngé édí dá ke dá síbí é mbé ya dúmá, édí dá dá lajan édo dá ye dan bo ya dúmá.

<sup>12</sup>Édo é ne ná, bía bí tóó ya amvála oyan te, bía bíra kóbo kaa wɔɔɔ, <sup>13</sup>se amvála ané Moisés a ngá bo eé dzip ásu deñ ya etóp, á mfá ye ná bwann Israel bé táa ní bem mís ásu, ébe asúgánn ye édí é ngá ke dá síbí; <sup>14</sup>ve miló myeba mí ngá mana bó tɔbo aleét, amú ná ye anzukwíñ émuú, éyɔɔ bá lán bífíá bíye á nnomm elat étóp evóó ya evóó te, é ngén é yala, akála ná dá dá kólo ébe Kristo. <sup>15</sup>Éde ye anzukwíñ émuú, éyɔɔ ése bá lán mébá Moisés, etóp te é yala mílém myeba, <sup>16</sup>ve, ngé mot á búlán ébe Ntí, etóp te dá é kólo. <sup>17</sup>Éde Ntí éñe a ne Nsísim, é vóm Nsísim Ntí ó ne, véa filí e ne. <sup>18</sup>Ve bía bésese, ya ásu éyéá été, bí bíli é dúmá Ntí ané á ngóóp été, bía ke bía tɔbo ntsénán ébe á dúmá ye á dúmá ámvála éfonann émyen, akála éséññ Nsísim Ntí.

### Aloá akála Yesus

**4** <sup>1</sup>Dá é tóó ná bí mbelé éséññ Nzamá dí, amvála bía bí ñɔɔ yaá nyénánn engóngóó, bíá teak, <sup>2</sup>fáve ná, bí tep yaá é mam méye áswéññ mé ne osoán, kaa ki áwulu ya mekeɔɔ, ngé ki áviri efíá Nzamá ya meduk, fáve ná ya nléránn bébélá éndendaɔ, bía lére nkyabán bía bébyen ébe ósímánn ye á nlém mot áse ósú Nzamá. <sup>3</sup>Ve, ngé é mbamba fwéñ wea a ne áswéññ, a ne áswéññ á mfá é bot bá dzán. <sup>4</sup>Ébá nzamá ye éniɔ dzí a dzip yaá miló míye é bot bé ne kaa ábwíni, ná bé bo kaa áyén éyéá é mbamba fwéñ ye á dúmá Kristo, éñe a ne éfonann Nzamá. <sup>5</sup>Amú ná bía bébyen bíá kat é mbamba fwéñ wea, fáve éñí Ntí Kristo Yesus, ve bía bébyen, áloá denan akála Yesus. <sup>6</sup>Akála ná Nzamá, éñí a ngá dzó ná, eyéá é feañɔe á dzíbi été, éñe fe a feañ yaá mílém myea éyéá ye á nyemann ébe é dúmá Nzamá dá feañ ásu Yesukristo.

### Ániɔ akála mbwínánn

<sup>7</sup>Ve bí belé ntam te bílas bí sí été, á mfá ye ná mora eyágán nguu á boóge éñí Nzamá, á bo fe kaa ábo áawea; <sup>8</sup>ná bíí yén bindáglé ébe dzam ése, ve bía kaa áyébe swaá; bía nzaman, ve bíá dzímle mebúnn; <sup>9</sup>bá dzén bía ásí, ve bí sés nlamann; bá sógle bía ásí, ve bíá dzán; <sup>10</sup>tám áse bía ke ya áwú Yesus ó ñúu, á mfá ye ná éniɔ Yesus dá é léreban é ñúu dea. <sup>11</sup>Amú ná bía é bot bí ne betétéá, éyɔɔ ése bá kee bía áwú akála Yesus, á mfá ye ná éniɔ Yesus dá é léreban ébe éwúwúa ñúu dea. <sup>12</sup>Édo é ne ná, awú édo é bo ébe bía, ve eniɔ dá ébe mína.

<sup>13</sup>Ve bía bí belé nsísim mbóó ya mbóó te ye á mbwínánn, amvála ané édí é ne ntsilann ná: Maá bwíni, akála te édo me ngá kóbo; bía bía bwíni fe, akála te édo bía bía kóbo fe. <sup>14</sup>Éde bía bía yem ná éñí a ngá wómo Ntí Yesus, ní aa ye fe bía wómo bíabe Yesus, aa ye fe bía lére fufúlu bíabe mína. <sup>15</sup>Amú ná ébe mam mése méte mé boban yaá akála denan, á mfá

ye ná é mvɔmm da ke da ke ébe abwiññ bot, eé bɔ ná mvéán akíba ó fwiige á mfá é dúmá Nzamá.

<sup>16</sup>Édo ná, bíá teak, afáñbɔ ná é mot ye átán wea aa ke aa bweñ avítsan avítsan; ve é mot ye nlém été wea, aa ke aa tɔbɔ mfefeñ mos ya mos. <sup>17</sup>Amú ná ovovos ndzuúk wea bía lot été wí, wá wá vé bía é mvaba ye á dúmá e ne mbéámbéá, éñí bé sés kanan ya dɔ, <sup>18</sup>é tám mína bɔ kaa ábem mís ébe é mam má yéne, ve fáve émá mé ne kaa áyéne; amú ná é mam má yéne má tɔbɔ avítsan tám, ve émá mé ne kaa áyéne émo má tɔbɔ mbéámbéá.

### Bí belé é ndá e ne mbéámbéá á dzóp été

**5** <sup>1</sup>Amú bía yem ná éyɔɔ é ndá dzea ye é sí ñí, éñí e ne étɔbɔga dea ñí, ngé e tsam, bí belé ndá ébe Nzamá; éñí e ne mbéámbéá á dzóp été, e tɔɔ kaa nlónján ya mó mé bot. <sup>2</sup>Amú dzam te fe bía kɔɔle, bí kómo tɔbɔ mbwátán ya étɔbɔga dea ye á dzóp été, <sup>3</sup>éde ngé bá ye koan ya bía mbwátán, bíá ye tɔbɔ swéñ. <sup>4</sup>Amú ná bía é bot bí tɔɔ é ndá ñí, bía kɔɔle ya ndzálánn ya midzuúk. Amú bíá kómo bɔ kaa átɔbɔ mbwátán, fáve ná átɔbɔ mbwátán, á mfá ye ná éwúwúa ñúu dí, eniɔ é min dɔ. <sup>5</sup>Éde éñí a koman yaá bía á mfá dzam te a ne Nzamá, éñe fe a vé yaá bía Nsísim ané ébánn é ne é ngap ósúá.

<sup>6</sup>Ya dzam te bí tɔɔ ya mebúnn eyɔɔ ése ná, bí yem ná ntéññ bí ngén bí tɔɔ é ndá ye é ñúu ñí, bíabe Kristo bíá bé tɔbɔ vóm mbɔɔ. <sup>7</sup>Amú ná bía niɔ ya mbwínánn, se ákála nyénánn; <sup>8</sup>ve bí tɔɔ ya mebúnn, bía dan fe yén mvéáñ ná, bí bɔ kaa átɔbɔ ébe é ndá ye é ñúu ñí, ná bí ke tɔbɔ fufúlu bíabe Ntí. <sup>9</sup>Ya ákála te édo fe, bía dzéɔ ná, ané bí ne kɔɔ ngé bí ne ki, bí vé ñí mesán á nlém. <sup>10</sup>Amú dá yian ná, bía bésesé bí ke tébe ébe ású étɔɔ nkíkán misan Kristo, ná kada mot á ñɔɔ é máán má yian ya ñí ébe míbɔann a ngá bɔ é tám a mbé a tɔɔ é ñúu ñí, ané mvéáñ, ané abé.

### Fwéñ ye á mvwaá

<sup>11</sup>Éde, dá é tɔɔ ná bía yem é wɔɔɔ Ntí, bía dzéɔ ná bot bé yébe Ntí; ve ébe Nzamá bía bí léreban yaá, me tɔɔ fe ya mebúnn ná bía bí tɔbɔ fe nléránn ébe ásímánn ye á mílém denan. <sup>12</sup>Bíá bera mína lére nkyabán bía bébyen, fáve ná bía vé mína afóo ná míní vága ákála dea, á mfá ye ná míní belé eyalann ébe ébá bá vága ya é mam má yéne ya mís, ve se ákála édí ye á nlém été. <sup>13</sup>Amú ná ngé bí ne kaa kén, é ne á mfá Nzamá, ve ngé bí ne ya kén, é ne á mfá wenan. <sup>14</sup>Amú ná édziɔɔ Kristo dá dzwée bía, éde bía biñ nkíkán wí ná, mot mbɔɔ éñe a ngá wú ákála bot bése, véa bot bése bá bé ngá wú fe. <sup>15</sup>Éde a ngá wú ákála bot bése, á mfá ye ná ébá bá niɔ, bé sés niɔ á mfá bébyen, fáve á mfá éñí a ngá wú, a wómo fe ákála deba.

<sup>16</sup>Édo é ne ná, atée ye áwola dí, bíá yem mot enziɔ ya nyemann mot binam, atwaa ngé bí yem yaá Kristo ané mot binam, áwola dí bíá yem

fe ñí néa. <sup>17</sup>Akála dzam te, ngé mot enziŋ a ntɔ́ó ébe Kristo, a ne mfefeñ mvelann mot, miyomm mí mam mí lot yaá; éndagá mam mése mé ntɔ́ó mifefeñ. <sup>18</sup>Ve édí te ése, dá sɔ́ ébe Nzamá, éñí émyen a ngá kom ókaŋŋ bíkwan bíabe bó ébe Kristo, ané a ngá vé bía eséññ ye á nkómánn ókaŋŋ bíkwan; <sup>19</sup>dá yíli ná, ébe Kristo, Nzamá émyen a ngá kom ókaŋŋ bíkwan bá eniŋ ngúrá, éñe kaa áláŋ bot mítsamann metsiŋŋ myeba, éde a kee yaá bía nkatann fwéñ ye á nkómánn ókaŋŋ bíkwan. <sup>20</sup>Édo ná, bí ne ébá bá kóbo éveŋ Kristo; amvála ané, ngé ébe bía, Nzamá aa lép mína ná, ébe éyola Kristo, bía dzaa ná, komján ókaŋŋ bíkwan mínabe Nzamá.

<sup>21</sup>Éñí eé ndzí yem nsémm, ákála dea Nzamá aa bó ñí nsémm, á mfá ye ná bí ne bó é nzósoó Nzamá ébe éñe.

**6** <sup>1</sup>Éde bí tɔ́ó bebo eséññ fufúlu, bía lép fe mína ná míní táa ñɔŋ é mvɔmm Nzamá ané nzeze; <sup>2</sup>amú aa dzó ná:

“Maá beá wa é tám e ngá yian,  
maá vwála fe wa á mos ye ákoroga.”

Dággé, áwola dí édo é ne é tám dá yian; dággé, áwola dí édo é ne mos ye ákoroga!

#### **Pablo aa yén midzuúk eséññ Nzamá été**

<sup>3</sup>Bía kaa ávé mot enziŋ dzam ye ákɔp obaá, á mfá ye ná eséññ Nzamá é nza yéne ya meku. <sup>4</sup>Fáve ná bía lére édí bía bébyen ébe dzam ése ané bevwála biséññ; ébe abwiññ edzíp, ébe midzuúk, ébe ndzéŋŋ mam, ébe eywiññ, <sup>5</sup>ébe biyíra, ébe ntɔbán á mbok, ébe nzamzámánn mam, ébe biséññ, ébe ntɔbán evévéñ, ébe nkián bidzí ngúrá tám; <sup>6</sup>ébe nlém mfúbánn, ébe nyemann, ébe ánzomo mam, ébe esós, ébe á Mfufúp Nsísim, ébe édziŋŋ é ne kaa meduk, <sup>7</sup>ébe á nkɔbán bebélá, ébe é nguu Nzamá; ya fe ébe byém melúmán bíye á nzósoó á mfá meyóm ye á mfá meyéa; <sup>8</sup>ya ébe á ngaŋŋ ya á mvyan, ya ébe á mbéa ewógá ya á mbamba ewógá; amvála ané beduk bot, ve bebélá bé bot; <sup>9</sup>amvála ané ébá bot bá dzími, ve ébá bot bá túga yem; amvála ané biwúwúá, ve dággán ná bía bí ne betétéa; amvála ané beñɔŋ mekira, ve bá kaa bía áywiñ; <sup>10</sup>amvála ané ébá bé tɔ́ó eywiññ, ve bía bí ne ya mesán tám áse; amvála ané mitétéññ, ve bí bó abwiññ bot ná é belé abwiññ; amvála ané bí belé dzóm enziŋ, ve bía bí belé ásesé.

<sup>11</sup>Á bot béye á Korinto, ánu dea é yóŋbe yaá ébe mína, bí yó yaá fe mína nlém wea; <sup>12</sup>bíá bé mína ñím édziŋŋ dea, fáve ná mína fá míní ñím yaá mína bébyen edziŋŋ. <sup>13</sup>Éde amvála te fe avóó ya avóó, (ma kóbo ya mína ané bwán) mína yóggán fe bía mílém myenan.

#### **Kaa ábo bilat mínabe é bot bé ne kaa ábwíni**

<sup>14</sup>Míní táa tsinan fálara mínabe ébá bé ne kaa ábwíni, amú ná nzá angɔmm nzósoó a belé bá ekúkwát? Ngé ki ná, nzá awókágán eyéa é belé

bá dzibi? <sup>15</sup>Dzé ki bé belé fufúlu Kristo bá Sátan? Ngé ki ná, nzá ngap mbwíni a belé bá é mot a sés mbwíni? <sup>16</sup>Dzé bé belé fufúlu é templo Nzamá bábe biyemá? Amú ná bía bí ne é templo é Nzamá a ne ntétéá; amvála ané Nzamá a ngá dzó ná:

“Ma ye bó tɔbɔ été,  
éde ma ye wulu énzénzanɔ deba.

Ané ma ye bó é Nzamá weba,  
bá bá ye fe bó é bot bam.”

<sup>17</sup>Ya dzam te édo, “kólogán énzénzanɔ deba été, tɔbɔgán nkánán, néa éñe Ntí aa dzó:

“Míní táa ki nama édí é ne mvin,  
ané ma ye mína ñɔɔɔ.

<sup>18</sup>Éde ma ye bó Éséá wenan,  
mína mína ye fe bó á mfá wɔm  
bwann befám ya bwann bé biningá.  
Ntí éñí a ne ya nguu ése éñe aa dzó do.”

**7** <sup>1</sup>Édo ná á mindzindziɔɔ myám, é tɔɔ ná bí belé mengaá méte, bí fúbugán bía bébyen ébe ayeɔɔ ése ye ó ñúu ye édí ye á nsísim, bí bó ntélán eki wea ewólo ébe é wɔɔɔ Nzamá.

### Mésán Pablo

<sup>2</sup>Váán bía afóo; bí ndzí bába mot enziɔ, bí ndzí ywíñ mot enziɔ ntuk, bí ndzí ki duan mot enziɔ. <sup>3</sup>Mää dzó do á mfá ávé mína meku; amú me tára yaá dzó ná míní ne bía mílém été, ané áwú, ané ániɔ. <sup>4</sup>Me belé ededeá filí á mfá wenan; ma bíra fe vága ya mína; ébe ndzuúk wea ósesé, me ne ndzálánn ya mfoɔann nlém, mesán má ma fwíge fe ma.

<sup>5</sup>Amú ná éyɔɔ bí ngá sian á Masedonia, é ñúu dea deé ndzí belé awaabé, fáve ná bí ngá yén midzuúk ébe mífá míse; átán, melúmán; mílém été ñí ya wɔɔɔ. <sup>6</sup>Ve Nzamá éñí aa foɔ mílém ébá bé ne nsilann ósí, éñe, a ngá foɔ bía mílém ya ásóó Tito; <sup>7</sup>se fáve ya ásóó weñ, ve ya fe mfoɔann nlém éwí mína ngá foɔ ñí ya wó, eé kat bía fwéñ é bora nkómánn wenan, míyónn myenan ya ábéánn denan ákála dam; akekwiñ ná mé ɔga bíra daɔ sán.

<sup>8</sup>Amú ná ngé má vé mína eywiññ ya é kálara wɔm, mää dzoban ya do. Atwaa ngé maá dzoban ya do, me téa fá ná kálara te aá vé mína eywiññ, afáɔbɔ ná fáve oyomm abóɔɔ tám. <sup>9</sup>Ve áwola dí ma sán, se amú ná míní ngá tɔbɔ eywiññ, fáve akála ná míní ngá tɔbɔ eywiññ á mfá ádzoban;

amú ná míní ngá tɔbɔ eywiññ amvála ané nkómánn Nzamá ó ne, á mfá ye ná míní nza dzímle dзам enziŋ á mfá wea. <sup>10</sup>Amú ná éywiññ é ne amvála ané nkómánn Nzamá ó ne dá ke ya mot édzoban á mfá akoroga, kaa ávé eywiññ; ve eywiññ ye éniŋ dzi dá nzu ya mot áwú.

<sup>11</sup>Amú ná, dággán é dзам dí ébyen, nzá nkée dзам te é vé yaá mína! Átɔbɔ eywiññ amvála ané Nzamá aa kómo, nzá okamŋa, nzá meyéá, nzá wɔŋŋ, nzá nkómánn, nzá abéánn, nzá akunŋa. Ébe dзам ése míní lére yaá mína bébyen ná míní ne nkeññ ébe dзам te. <sup>12</sup>Édo ná, afáŋbɔ ná maá tsili mína, deé ndzí bɔ akála éñí a ngá bábe mot, ngé ki akála éñí a ngá tɔbɔ mbábánn, fáve ná akála nkée wenan á mfá wea ó léreban mína éyéá ósú Nzamá. <sup>13</sup>Akála te édo bí ngá tɔbɔ ya mfoŋann mílém.

Ve á mfá mfoŋann mílém wea, bía daŋ bíra sán akála mészán Tito, amú ná nsísim weñ, wá biñ awaabé ákála mína bésesé. <sup>14</sup>Ngé me bɔ yaá mevágá ya ñí ébe dзам enziŋ á mfá wenan, meé ndzí wók osoán; fáve ná, amvála ané bí kɔbɔ yaá ya mína dзам ése bébélá, amvála te fe mevágá mea ébe Tito ma me sùgan yaá fe bébélá. <sup>15</sup>Édo ná nlém weñ ébe mína ó ne onén ádaŋdaŋ éyɔŋ aa síman méwók mína bésesé, ámvála míní ngá ñɔŋ ñí ya wɔŋŋ ya beñeñeá. <sup>16</sup>Ma sán, ná me tɔɔ ya mebúnn ya mína ébe mam mése.

### Áñep bot béye á Masedonia

**8** <sup>1</sup>Éde, á bɔbédzaŋ, bía bɔ mína ná míní yem é mvɔmm Nzamá, éñí bé vé yaá ébe bíkóánn bebwíni bíye á Masedonia, <sup>2</sup>ná ébe mora nkat ye á ndzuúk, mészán meba má mé ngá fwíige, ededeá átéññ deba dá é ngá daŋ fe fwíige ébe ntam ye áñep deba. <sup>3</sup>Ma vé ngañiá ná, amvála mam bé mbé belé, bá vé ya nkómánn weba álot ábímm mam bé mbé belé; <sup>4</sup>bée dzaa bía ya abwiññ ndzaá ná bí vé bɔ afóo ná bé ñɔŋ ngap ébe mvɔmm ye ávwála bebwíni, <sup>5</sup>se ki ané bí ngá tém, fáve ná bé ngá tára vé bébyen ébe Ntí, véa ébe bía amvála ané nkómánn Nzamá ó ne; <sup>6</sup>ya dзам te édo bí ngá dzaa Tito ná, ámvála a ngá tára, amvála te édo fe á mana ébe mína é mvɔmm ñí. <sup>7</sup>Ve amvála ané míní ne ndzálánn ébe dзам ése, ébe á mbwínánn ya ébe éfiá, ébe á nyemann ya ébe nkée ósesé, ébe édziŋŋ míní ngá lére á mfá wea, ná míní tɔbɔ fe ndzálánn ébe é mvɔmm ñí.

<sup>8</sup>Máá kɔbɔ do ané bá mánan, fáve ná ákyak nkée ébe é bot bevɔɔ, ya fe é bébélá édziŋŋ wenan. <sup>9</sup>Amú ná mína yem é mvɔmm Ntí wea Yesukristo, ná ákála denan, a tɔɔ nkúkúmm, ñí aa ngá veŋan ntétéññ mot, á mfá ye ná ébe átéññ deñ, míní nzu veŋan mikúkúmm.

<sup>10</sup>Ébe é dзам dí ma vé mína é fak dam; amú ná dзам te dá é ne fe mína ya abúánn, mína é bot, se fáve ná míní ngá tára do bɔ, ya fe ná míní ngá kómo do bɔ, atéé ye á mbú ó ngá lot; <sup>11</sup>ve áwola dí, dzálágán fe do ya mbɔann, ná ámvála míní mbé míní tɔɔ nkomann ya mbamba nkómánn,

amvála te fe míní dzálá dɔ ébe é dzóm míní belé. <sup>12</sup>Amú ná ngé mbamba nkómánn á ntɔ́ɔ́, bá yébe ámvála é dzóm bé belé, se ané é dzóm bée belé.

<sup>13</sup>Măá dzó dɔ á mfá ye ná bot befé bé belé avwálá, ve mína mína ndzuúk, fáve ná ábo ntéññ mbóó. <sup>14</sup>Éde ébe é tám ní, ábwiññ denan dá é dzálá á ndzénɲ weba, á mfá ye ná ábwiññ deba dá é dzálá fe ndzénɲ wenan, ná ábo ntéññ mbóó. <sup>15</sup>Ámvála é ntɔ́ɔ́ ntsilann ná: “Éñí a ngá twáa abwiññ, éé ngá buk ní, éñí ní a ngá twáa avítsan, ní éé ngá yi ki dzóm.”

### **Tito bábe bemvwiññ**

<sup>16</sup>Ve, akíba ya Nzamá éñí a vé yaá nkée ovóó ya ovóó ébe nlém Tito á mfá wenan; <sup>17</sup>akála melépgá a ngá ñɔɲ, ní a tɔ́ɔ́ ya ededea abéánn, a téé yaá ná a nzu ébe mína ya nkómánn weñ.

<sup>18</sup>Éde bíabe bó fufúlu bí lóm yaá mwadzan, éñí éwógá deñ ébe á mbamba fwéñ, é ne ébe bíkóánn bebwíni bíse, <sup>19</sup>se fáve édo etámm, ya fe ná bíkóánn bebwíni bí tɔ́p yaá ní ané mvwiññ dea ye ékena ébe é mvɔmm ní, éñí bía bó ya dɔ eséññ á mfá é dúmá Ntí émyen, á mfá álére mbamba nkómánn wea; <sup>20</sup>bí dzip ná mot enziɲ a nza bía vé meku ébe abwiññ mvɔmm bía séan ya dɔ dí; <sup>21</sup>amú ná bía dzén ná bí bó édí e ne mvéáñ, se fáve ósú Ntí etámm, ya fe ósú bot.

<sup>22</sup>Éde bía lóm mwadzan wea bábe bó, éñí bí kyak yaá abwiññ bíyɔɲ ébe nkée weñ ébe abwiññ mam. Ve, áwola dí a ne ededea nkée, ya abwiññ mébúnn a tɔ́ɔ́ ya mína. <sup>23</sup>Á mfá Tito, a ne ñɔɲgap ye eséññ dam, bía ní bía bó fe eséññ á mfá wenan; éde á mfá bɔ́bédzan, bé ne milómán míye bíkóánn bebwíni ya é dúmá Kristo. <sup>24</sup>Édo é ne ná, míníí lére bó ndem ye edziɲɲ denan ósú bíkóánn bebwíni, ya ákéá mevágá meá á mfá wenan.

### **Avwálá á mfá bɔ́bédzan**

**9** <sup>1</sup>Amú ná ngúra mfá, ébe avwálá á mfá mítɔ́pbán mí bɔ́bédzan, dá buk ná me tsili mína; <sup>2</sup>akála ná ma yem é mbamba nkómánn wenan éñí ma vága ya ní ébe ású Bemasedonio, ná Akaya á tɔ́bo yaá nkomann atée ye mbú ó ngá lot, éde ná abéánn denan é túm yaá abwiññ bot ásí.

<sup>3</sup>Ve mfá mbóó, me lóm yaá bɔ́bédzan, ná mévágá mea ébe mína mé nza bó nzeze ébe dza te, ná míní tɔ́bo nkomann ámvála me ngá dzó dɔ; <sup>4</sup>á nza bó ná ngé Bemasedonio benziɲ bé sɔ́ bíabe bó, bé koan ya mína kaa nkomann, véa bía bía ye wók osoán ébe mévágá mea, (á mfá ye ná me nza dzó ná mína). <sup>5</sup>Édo me ngá tém ná dá yian ná bí lép bɔ́bédzan ná bé tára ke ósú á mfá ánzú ébe mína, ná bé tára koman avwálá añep denan míní ngá tára kyaa, á mfá ye ná é tɔ́bo nkomann amvála ané avwálá añep, se ané ébá bé belé onzáɲɲ akúmm.

### **Bía vé ya mesán**

<sup>6</sup>Ve ma dzó édí ná: “Éñí aa beñ avítsan, aa ye fe yoo avítsan; éñí ní aa beñ abwiññ abwará, aa ye fe yoo abwiññ abwará.” <sup>7</sup>Éde kada mot á vá

amvála ané a ngá tára kík á nlém weñ été, se ya nlém eywiññ, ngé ki ya ntsinann; amú ná Nzamá aa dziŋ éñí aa vé ya mesán. <sup>8</sup>Nzamá a ne bɔ ná mvɔmm ése eé fwíge ébe mína; á mfá ye ná míní belé eyɔŋ ése ábím dá yian, ébe byém bíse, ná míní fwíge á mfá mbamba mbɔann óse; <sup>9</sup>ámvála é ntɔɔ ntsilann ná:

“A ngá myea, a ngá vé mitétéññ;  
é nzósoó weñ aa laŋan kómm áse.”

<sup>10</sup>Éde, éñí aa vé é mot aa beñ mvɔŋ ya mfém ébe é mot aa dí, aa ye vé, á fwiñ fe é mvɔŋ dzenan, aa ye fe kɔgle bibumá bíye é nzósoó wenan; <sup>11</sup>mína ye tɔbɔ ededea ndzálánn ébe dzóm ése á mfá ávé ya nlém añep ósesé, éwí wá vé Nzamá akíba ébe bía. <sup>12</sup>Amú ná mbɔann éséññ Nzamá ye ákee ávwálá dí, dáa dzéa édí mítópban mí bɔbédzaŋ myá yi etámm, fáve ná dá dzéa fe abwiññ mvéan Nzamá akíba; <sup>13</sup>ébe édí mína ye vé, bé vé Nzamá dúmá, amú mewók menan ya fe mémem menan ébe é mbamba fwéñ Kristo ya ávwálá añep denan á mfá weba ya á mfá bot bése. <sup>14</sup>Éde bá á mfá weba, ya meyaglán á mfá wenan, bá bé lére fe édziŋ deba ákála ededea abwiññ ábwará Nzamá e ne ébe mína. <sup>15</sup>Akíba ya Nzamá akála é dás deñ bé sés vé nkanaja.

### É nguu édzwée apostol Pablo

**10** <sup>1</sup>Éde mámyen, Pablo, ma bíra mína dzaa ébe evwévwé nlém ya añep Kristo, ná é tám me ne énzénzaŋ denan ma yéne ané me ne ya nsilann ñúu ósí, ve é tám da me ntɔɔ kɔɔ mé nga baŋan ya mína; <sup>2</sup>éde ma bíra dzaa ná é tám ma ye mína tɔbɔ été, me táa mína baŋan akála mébúnn me tɔɔ ya mɔ ná ma ye bɔ aywá ébe é bot benziŋ bá ñɔŋ bía amvála ané ngé bía niŋ ané bot béye é sí ñí. <sup>3</sup>Amú ná atwaa bía niŋ ané bot béye é sí ñí, bíá lúman amvála ané bot béye é sí ñí, <sup>4</sup>amú ná byém melúmán byeá bí sés ébí bot béye é sí ñí, fáve ná bí ne biwólo ébe Nzamá ná byá tsam mendá ménguu mé edzwée, <sup>5</sup>bíí wea mekéá ósí ya fe é dzóm ése dá tébe nyemann Nzamá á ngamm áyát, bíí ke fe ya otémŋa ósesé míkómm ná ó bɔ Kristo mewók. <sup>6</sup>Bí téle fe nkomann á mfá ávé akira mbɔann meló ósesé, éyɔŋ méwók menan mé ntɔɔ ndzálánn.

<sup>7</sup>Mína yén mam amvála ané má yéne átán. Ngé mot enziŋ a tɔɔ émyen ya mebúnn ná a ne éñí Kristo, á beragá dɔ tém á mfá weñ émyen ná, amvála ané a ne éñí Kristo, bía bí ne fe dɔ. <sup>8</sup>Amú ná mää ye wók osoán, afáŋbɔ ná ma bíra vága ébe é nguu édzwée dea, éñí Ntí a vé yaá á mfá ávé mína nguu, se átsam mína, <sup>9</sup>ná é táa fonan amvála ané ngé ma kómo mína vé bisisis ébe bekálara bam. <sup>10</sup>Éde ngúrá mfá, bá dzó ná, bekálara bé ne adziít ya nguu, ve á mfá mbóɔ, ñúu da yéne ané ntéteák mot, efíá dá é ne fe ané édí bé byana yaá. <sup>11</sup>Mot te, á ñá táŋ édí ná, édí bí ne éfíá ébe bekálara, bí tɔɔ kɔɔ, bí ne fe dɔ á mbɔann é tám bí ntɔɔ.

<sup>12</sup>Amú bíá yébe ná bíá lánj bíá bébyen ngé ki ákánan bíá bébyen ya bot benziŋ béye ébá bá sák bébyen, ve béé vakgan bébyen ya bébyen, béé kanan fe bébyen ya bébyen, bé ne kaa fak. <sup>13</sup>Ve bíá, bíá vága ábímm é ne kaa áyian, fáve ná amvála abímm ovakga Nzamá a ngá lére bíá ná bí nzu koan ya mína. <sup>14</sup>Amú ná bíá loran óvakga wea, amvála ané ngé bíá bé koan ya mína, amú ná bíá bíá tára nzu áasian ébe mína ya é mbamba fwéñ Kristo. <sup>15</sup>Bíá bébyen bíá vága ábímm é ne kaa áyian ébe biséññ bot befé, ve bí tóó ya oyan ná, amvála ané mbwínánn wenan wá yémbe, bíá bíá ye fe bíra tóbó mbélánn ó yóp ébe mína ya óvakga wea, <sup>16</sup>á mfá ákat mbamba fwéñ ébe mévóm mé ne mína ósú, ná bí nza vága ébe óvakga é bot bevóó bé bɔ yaá.

<sup>17</sup>Ve é mot aa vága, á vágge ébe Ntí; <sup>18</sup>amú ná áá tóbó nkyabán éñí aa sák émyen, fáve éñí Ntí éñe aa sák.

### Pablo bábe bora bé baapostol

**11** <sup>1</sup>Ngwáa ngé mína nzomo ma ébe oyomm akút! Ve, mína nzomoŋán ma. <sup>2</sup>Amú ná me ne mbébéánn ákála denan ya ábéánn Nzamá, amú ná maá vé mína atsiŋŋ alúk ébe nnóm mbóó á mfá álére mína ébe Kristo amvála ané éndúnn ngwan é ne kaa ayeŋŋ. <sup>3</sup>Ve, ma kɔ wɔŋŋ ná, é táa bɔ amvála enziŋ ná ané ñó ya mékeŋŋ meñ e ngá duk Eva, átémŋa denan dá é lés fe ébe nlém mbóó ya mfúbánn ébe Kristo. <sup>4</sup>Amú ná bébélá, ngé mot enziŋ aa nzu eé kat é fwéñ Yesus mfé, éñí bíí ndzí kat fwéñ, ngé ki ná mína ñɔŋ nsísim mfé aa selan ye éñí míní ngá ñɔŋ, ngé ki ná mína yébe é mbamba fwéñ aa selan ye éñí míní ngá ñɔŋ, mína mína túga dɔ nzomo. <sup>5</sup>Amú ná ébe dzam enziŋ ma ñɔŋ ná me sés omomot enziŋ á mfá bora bé baapostol béte. <sup>6</sup>Ve ngé me ne bɔ ndzímán á nkóbo, me sés dɔ á nyemann, fáve ná ébe mam mése, bí lére yaá mína ásesé.

<sup>7</sup>Ye maá bɔ nsémm, ná meé sili mámyen ósí á mfá ye ná mína míní tóbó mbélánn ó yóp; dá é tóó ná maá kat mína é mbamba fwéñ Nzamá á nzeze? <sup>8</sup>Me ngá dzíp bíkóánn bebwíni bifé, meé ñɔŋ ntáj ébe bó á mfá ábo éséññ Nzamá ébe mína, <sup>9</sup>éde é tám dá me mbé bíabe mína, méé yi fe byém, meé ndzí bɔ mot enziŋ mbaga; amú ná niané bóbédzaŋ bé ngá sɔ á Masedonia, bá dzálá ma ya é byém me ngá yi; éde ná maá baale mámyen ébe dzam ése, ma ye fe baale mámyen ná me táa mína bɔ mbaga. <sup>10</sup>Amvála ané é bébélá Kristo a ne ébe ma, ébe éngúŋ dam te báá ye ma kam ya dɔ ébe mebeŋŋ mé sí méye Ákaya. <sup>11</sup>Amú dzé? Ye é ne ná mää dziŋ mína? Nzamá éñe aa yem dɔ!

<sup>12</sup>Ve, é dzam ma bɔ, ma ye tsíni ná ma bɔ dɔ ná me dzip afóo, edí é bot bá kómo, ná bé lére bébyen ané ntéññ mbóó ya bíá, ébe edí bot béte bá vága.

<sup>13</sup>Amú ná bot béte bé ne baapostol méduk, minéneá bebo biséññ, bá veŋan bébyen ané é baapostol Kristo. <sup>14</sup>Dé sés ki nzigan; amú ná Sátan ñí aa veŋan fe émyen ané ángel ye éyéá. <sup>15</sup>Ya amú dzam te, dá é sés eyágán dzam, ngé

bevwála bíséññ beñ bá bá verjan fe bébyen amvála ané bevwála bíséññ béye á nzosoó; á súgánn deba dá ye bɔ amvála ané míbɔann myeba mí né.

### Mídzúúk Pablo

<sup>16</sup>Ma bera dzó ná, mot enziŋ a táa ma ñɔŋ ané me ne okúkút mot; ve ngé mína bɔ dɔ, ñɔŋŋán ma atwaa amvála ané okúkút mot, á mfá ye ná ma me vága fe oyomm abímm. <sup>17</sup>Ébe é dzam ma kóɔ, máá kóɔ dɔ amvála ané édí Ntí, fáve amvála ané okúkút mot, ya me búnn méte ná ma me vága ya mɔ. <sup>18</sup>Dá é tɔɔ ná abwiññ bot é nga vága yaá amvála ané bot béye é sí ní, ma ma ye fe vága. <sup>19</sup>Amú ná, míni tɔɔ mifefák, mína mína nzomo é bot bé ne mekút mé bot; <sup>20</sup>akála ná, ngé mot enziŋ aa tɔɔ mína mikómm, ngé mot enziŋ aa víli mína byém, ngé mot enziŋ aa duan ya mína, ngé mot enziŋ aa bére émyen ó yóp, ngé mot enziŋ aa bími ki mína á sú, mína mína nzomo dɔ.

<sup>21</sup>Ma dzó dɔ á mfá osoán, amvála ané ngé bí bɔ yaá mitéteák; ve ébe dzam enziŋ afé ye mot enziŋ a ne bɔ éngún, (ma kóɔ dɔ ané okúkút mot), ma ma bɔ fe éngún. <sup>22</sup>Ye bé ne bwann Beebreo? Ya fe ma! Ye bé ne bwann Beisraelita? Ya fe ma! Ye bé ne é mvɔŋ Abraam? Ya fe ma! <sup>23</sup>Ye bé ne bevwála bíséññ Kristo? (Ma kóɔ amvála ané ngé me ma dzímle yaá kén), ma ma dan; ébe bíséññ, byá bíra ma fwíge; ébe ntɔbán á mbok, abwiññ bíyɔŋ; ébe biyíra, bí sés ya tán; ébe baáŋgónó ye áwú, abwiññ bíyɔŋ; <sup>24</sup>ébe Bejudio, me ñɔŋ yaá milóŋŋ mewóm mé léa ya milóŋŋ ebuú tán biyɔŋ bí tán; <sup>25</sup>bé yít yaá ma ya mikás tán biyɔŋ bí léa; bé lúm yaá ma mekwá, eyɔŋ evóɔ; byéa ó kúbán yaá ya ma, tán biyɔŋ bí léa; me lot yaá ngúra alú ya ngúra mos édwá mán été; <sup>26</sup>ébe bikena, abwiññ bíyɔŋ; ébe baáŋgónó béye aswíñ, ébe baáŋgónó béye benzeé midzɔŋŋ; ébe baáŋgónó béye bot béye é sí dam, ébe baáŋgónó béye bot béye meyɔŋ mefé; ébe baáŋgónó béye á kísoan été, ébe baáŋgónó béye éyáŋŋ été, ébe baáŋgónó béye á mán été, ébe baáŋgónó béye énzénzan bɔbédzan béye méduk, <sup>27</sup>ébe eséññ ya fe mvwaránn; ébe abwiññ melú mé evéveññ; á nzeñ ya fe evéé; abwiññ bíyɔŋ kaa ádzí; ávép été ya fe kaa bitóp.

<sup>28</sup>Mam méte mé ne é má méye átán, ve mfá mbɔɔ, nkelann nlém ó yóp ákála bíkóánn bebwíni bíse wá wá dzéñ fe ébe ma kada mos. <sup>29</sup>Nzá ané ntéteák, kaa ná ma ma tɔɔ fe ntéteák? Nzá bá bɔ ná ákɔp obaá, kaa ná ma bíra yéa?

<sup>30</sup>Ngé ma yian vága, ma ye vága ébe ntéteák me né. <sup>31</sup>É Nzamá ya Éséá Ntí Yesus, éní a ne ya olugú mbéámbéa, aa yem ná máá bɔ minéa. <sup>32</sup>Á Damasko, é ŋgóvina a ne édzwée kéza Aretas así, a ngá mómo é kísoan Bedamasko ná ábiñ ma. <sup>33</sup>Ve, bá bé ngá sili ma á wúna ye á mfim óngóo á mkpéñ été, néa éñe me ngá túp é mó meñ été.

### Miyénánn ya miléránn míye á Nsísim

**12** <sup>1</sup>Éngún dá yian; ve é sés ya abúánn; éde ma ye sian ébe míyénánn ya fe míléránn mí mam Ntí. <sup>2</sup>Ma yem mot enziŋ ébe

Kristo é lot yaá awóm mibú ya mibú mí nii (ngé é ñúu ñí, ngé ki se é ñúu ñí, mää yem, Nzamá éñe aa yem dɔ); mot te bá bómɔ ñí bé kéñ kwíñ ya ñí é dzóp léa. <sup>3</sup>Éde, ma yem amvála mot te (ngé é ñúu ñí, ngé ki se é ñúu ñí, mää yem, Nzamá éñe aa yem dɔ), <sup>4</sup>ná bá bómɔ ñí bé kéñ kwíñ ya ñí á Paraíso, ané a ngá wók bífiá bé sés kúlu ánu, ébí báá lík mot ná á kóbo byɔ. <sup>5</sup>Ébe amvála mot te, ma ye vága ya ñí, ve ébe á mfá wɔm, mää ye vága, fáve ébe é mam mé ne ateák. <sup>6</sup>Amú ná ngé ma kómo vága, mää ye vejan okúkút mot, akála ná ma ye kóbo bébélá; ve ma dzip dɔ mámyen, á mfá ye ná mot enziɲ á nza tém ébe ma álot ábimm aa yén ngé ki áwók. <sup>7</sup>Éde á mfá ye ná me nza bére mámyen ó yóp akála bora biyágán míleránn mí mam, dzam te édo, bá bem ma dɔ ya nsɔɲ ó ñúu, nkat fwéñ Sátan aa bɔ eé bími ma, á mfá ye ná me nza bére mámyen ó yóp. <sup>8</sup>Ébe dzam te, me dzaa yaá Ntí tán biyɔɲ bí léa ná, á vea ma dɔ. <sup>9</sup>Éde ñí a dzó yaá ma ná: “É mvɔmm dam da yian ya wa; amú ná é nguu dam da tɔbo fá ndzálánn áteák été. Éde dzam te édo ya ededea mesán ma ye vága ébe é mam me ne ya mɔ ntéteák, á mfá ye ná é nguu Kristo eé berebe ma áyóp. <sup>10</sup>Édo ná ma sán ébe é mam mé ne ya mɔ ntéteák, ébe nkóbán abé, ébe ndzénɲ mam, ébe ndzénján bot ásí, ya fe ébe éywiññ á mfá Kristo; amú ná éyɔɲ me ne ntéteák, véa éñe me ne ewólo mot.

### **Pablo bábe ékóánn bebwíni ye á Korinto**

<sup>11</sup>Éde, me vejan yaá okúkút mot; mína míní ngá tsíni ma dɔ. Amú ná mína míní ngá yian ma sák. Akála ná ébe dzam enziɲ meé ndzí bɔ omomot enziɲ á mfá bora bé baapostol, afánɲɔ ná me sés dzóm enziɲ. <sup>12</sup>Ve, méndem mé ápostol maá léreban énzénzanɲ denan été ya edzíp ése, ébe ya mendem, ya biyágán bí mam, ya fe ébe mam mé ne nguu. <sup>13</sup>Amú ná, ébe nzá dzam bá belan ya mína ané mínáá daɲ ya eban énzénzanɲ bíkóánn bebwíni bivóó? Nde se fáve edí ye ná mámyen meé ndzí mína bɔ mbaga? Dzwiigán ma ébe evuzá te!

### **Ékena léa Pablo**

<sup>14</sup>Túgán ma béa, éyɔɲ léa édo dí ná me ntɔɔ nkomann ná ma nzu ébe mína, éde ná, mää ye mína bɔ mbaga; amú ná mää dzénj edí é ne éedenan, fáve ná mína ma dzénj. Akála ná bwán bée belé mbaga ye ákóán byém á mfá beéséá, fáve ná beéséá á mfá bwán. <sup>15</sup>Ve ma, ya ededea mesán ma ye dzímle áandam, atwaa ma ye bíra dzímle mámyen ákála bínɲ byenan. Ngé ma bíra mína dziɲ, ye ná bá ye ma dziɲ avítsanɲ?

<sup>16</sup>Ve, é ntɔɔ néa, ma meé ndzí mína bɔ mbaga; fáve ná, me tɔɔ mot mekeɲɲ, me dzili yaá mína ya meduk. <sup>17</sup>Ye ná me duan yaá mína ébe mot mbóó ye ébá me ngá lóm mína? <sup>18</sup>Maá bíra dzaa Tito, me lóm fe mwadzanɲ bá ñí; ye ná Tito aá duan mína? Ye ná bíí ndzí wulu ya nsísim mbóó ya fe bibógá mébo bivóó ya bivóó?

<sup>19</sup>Mína tém ná é tám ní ése, bí mvá kam ya bía bébyen ébe ású denan. Ve ósú Nzamá éñe bía kóbo ébe Kristo; éde ná, á mindzindziŋ myám, mam mése mé ne á mfá ávé mína nguu á nlém. <sup>20</sup>Amú ma ko wɔŋŋ ná tám enziŋ éyɔŋ ma ye nzu, mé bo kaa ákoan ya mína ámvála ma kómo, mína míní bo fe kaa ákoan ya ma ámvála mína kómo; a ne bo tám enziŋ, mitéé, ya evínn, ya olúnn, ya nkánán mengamm, ya ávé éyola abé, ya miswa, ya ábo engúŋ, ya nzamzámánn, ná bí ne; <sup>21</sup>ya fe ná, é tám ma ye bera sian, é Nzamá wɔm ní á sili ma ósí ébe ású denan, véa mé ŋga tɔbo ya meyep ákála abwiññ bot é tara yaá mana bo nsémm, ébó kaa ádzoban ébe mvin, ya nsémm eveák, ya nwulann tugá, ébe ébí bé bo yaá.

### Míbámm myá súgan

**13** <sup>1</sup>Éyɔŋ léa édo ma nzu ébe mína dí. Bá ye tɔo kada adzó ya é nganiá bot bé beañ ngé ki bé léa. <sup>2</sup>Me tara yaá do dzó é tám me mbé eyɔŋ beañ, afáŋbo ná áwola dí me ne kɔɔ, ma bera do dzó ébe ébá bé ngá tara bo nsémm, ya fe ébe bésesé bevóó, ná ngé ma bera nzu, máa ye dzɔɔ. <sup>3</sup>Dá é tɔo ná mína dzéŋ é ndem é Kristo aa kóbo ébe ma, éñí a sés ntéteák á mfá wenan, fáve ewólo ébe mína. <sup>4</sup>Amú afáŋbo ná bá ywíñ ní ó krús ateák été, ve a ne ntetéá ya é nguu Nzamá. Nténñ mbóó bía bí ne fe mitéteák ébe éñe, ve bía ye tɔbo betetéá bíabe bó ya é nguu Nzamá á mfá wenan.

<sup>5</sup>Fasgán mína bébyen, ngé míní ne á mbwínánn été, kyakgán mína bébyen; ngé ki ná ye mína bébyen mínáá nú tán ná Yesukristo a ne ébe mína, fáve ngé é ne ná mínáá kyaba mikat? <sup>6</sup>Ve me tɔo ya mebúnn ná míní yem ná bíá ku mikat. <sup>7</sup>Éde bía yaglan ya Nzamá ná míní táa bo mbéa dzam enziŋ, se á mfá ye ná bí yéne ané nkyabán, fáve á mfá ye ná míní bo é dzam é ne mvéañ, afáŋbo ngé bía bí ne yéne ané ébá bé ku yaá mikat. <sup>8</sup>Amú ná bí sés bo dzam enziŋ ye é ne bebélá á ngamm áyát, fáve ébe ákála bebélá. <sup>9</sup>Amú ná bía sán éyɔŋ bí ne mitéteák, ve mína míní tɔo bíwólo; dzam te fe bía yaglan ya do, á mfá nkomann biniŋ wenan. <sup>10</sup>Akála te édo ma tsili ya do é mam má me tɔo kɔɔ, á mfá ye ná éyɔŋ mé ntɔo, mé bo kaa ábelan ya ngét amvála nguu édzwée Ntí a ngá vé ma á mfá ávé bot nguu, se á mfá átsam.

### Bifiá bíye ámanaja

<sup>11</sup>Á mfá asúgánn, á bobédzan, tɔbɔgán ya mesán, tɔbɔgán ya biniŋ nkomann, tɔbɔgán ya mfonann mílém, tɔbɔgán ya osímánn ovóó, tɔbɔgán fe mvwaá, véa Nzamá ye édziŋ ya mvwaá aa ye tɔbo mínabe bó. <sup>12</sup>Ábérán bevóó ya ébá bevóó ya ñánján memáŋŋ bobéñafwáa. <sup>13</sup>Mitópbán mí bot míse myá bérán ya mína.

<sup>14</sup>Ábwará Ntí Yesukristo, ya édziŋ Nzamá, ya fe áwókgán Mfúfup Nsísim, bí tɔbɔgé ébe mína bésesé.